

ԿՈՄԻՏԱՍԻ ՈՃԸ ԵՎ 20-ՐԴ ԴԱՐԻ ԵՐԱԺՇՏՈՒԹՅՈՒՆԸ

1919-ին Թիֆլիսում պրոֆեսոր Հարտմանի նշանավոր ելույթից հետո, որ «հայտնագործեց» (մասնավորապես «արևելահայերի» համար) Կոմիտաս-կոմպոզիտորին, թերևս ոչ ոք այլևս չփորձեց վիճարկել նրա բացառիկ դերը հայ պրոֆեսիոնալ երաժշտության ազգային ոճի ձևավորման մեջ: Հանրահայտ ճշմարտություն դարձավ այն, որ Կոմիտասն իր մշակումներում կիրառել է ներդաշնակման և բազմաձայնության այնպիսի միջոցներ, որոնք հարազատ են հայ ժողովրդական երաժշտության ազգային բնույթին, նրա լադային կառուցվածքին, ինտոնացիոն, մետրառիթմական, կոմպոզիցիոն առանձնահատկություններին: Սակայն նման, ընդհանուր առմամբ, ճիշտ կարծիքները, որպես կանոն, չէին հաստատվում Կոմիտասի երաժշտական ոճի կոնկրետ վերլուծությամբ, առավել ևս՝ չէր բացահայտվում նրա ստեղծագործական կապը համաշխարհային երաժշտական արվեստի հետ: Իսկ առանց դրա, մեր խորին համոզմամբ, անհնար է ճիշտ հասկանալ Կոմիտաս-կոմպոզիտորի ստույգ նշանակությունը և դերը հայ ազգային երաժշտության զարգացման մեջ:

Կոմիտաս-կոմպոզիտորի մասին եղած գրականությունը այնքան էլ հարուստ չէ, իսկ մեզ հետաքրքրող հարցի՝ նրա ոճի վերաբերյալ գոյություն ունեցող գրականությունն ավելի քան համեստ է: Հատկապես պետք է առանձնացնել Շահան Պերպերյանի հոդվածը, որը լույս է տեսել Փարիզում՝ որպես հանձարեղ արվեստագետի մահվան անմիջական արձագանք[1]: Չնայած ոչ մեծ ծավալին և ավելի քան երեսնամյա «հասակին», այդ հոդվածը թերևս լավագույնն է այն ամենի մեջ, ինչ առայժմ ասվել է Կոմիտասի մասին: Մանրագնին հղացված և ազնիվ ու նուրբ ոճով գրված այդ հոդվածը ոչ միայն զարմացնում է դիպուկ դիտողություններով ու համարձակ եզրահանգումներով, այլև հաղորդում է հենց իր՝ հեղինակի անձնավորության, Կոմիտասի հոգեհարազատ բարեկամներից մեկի, բացառիկ հմայքը: Ճիշտ է, հեղինակն իր մտքերն արտահայտել է էսքիզային ձևով, բայց և այնպես այդ հանգամանքը չի զրկում նրանց ուժից ու թարմությունից: Պերպերյանը հակիրճ ու ամփոփ տալիս է լադի, ռիթմի, վոկալ դեկլամացիայի, ներդաշնակման և բազմաձայնության ասպարեզում Կոմիտասի նորարարական մղումների պատկերը: Մասնավորապես, նա շեշտում է, որ Կոմիտասը հրաժարվեց եվրոպական երաժշտությանը բնորոշ մաժորային և մինորային լադա-տոնայնություններից: Որքան մեզ հայտնի է, Պերպերյանն առաջինն է, որ ապացուցում է կվարտա-կվինտային համահնչյունների առկայությունը Կոմիտասի ներդաշնակման մեջ (սա շատ կարևոր

դիտարկում է): Պերպերյանը խոսում է այն հետաքրքրության մասին, որ Կոմիտասը Փարիզում ցուցաբերել է ժամանակակից ֆրանսիական և ռուս կոմպոզիտորների նկատմամբ, ինչպես նաև այն ազդեցության մասին, որ այդ երաժշտական տպավորությունները գործել են Կոմիտասի արվեստի վրա՝ ստեղծագործության վերջին, առավել հասուն շրջանում: Սրանք նույնպես կարևոր են: Ցավոք, այդ հոդված-ակնարկի բնույթն իսկ չի ենթադրել հեղինակի առաջադրած դրույթների տեսական մշակում: Այնուհանդերձ, Պերպերյանի հոդվածը, որպես Կոմիտասի երաժշտական ոճն ըմբռնելու փորձ, որպես էսքիզ, աներկբա արժեք ունի:

Կոմիտասի երաժշտական ոճի որոշ խնդիրների տեսական մշակման անդրանիկ փորձը Ռ.Աթայանի «Ժողովրդական երգի ներդաշնակության սկզբունքը Կոմիտասի մոտ» հոդվածն է[2]: Աթայանը իրավացիորեն խոսում է այն բացառիկ պահանջկոտության մասին, որ ցուցաբերել է կոմպոզիտորը ժողովրդական երգերը մշակելիս և հատկապես շեշտում այդ աշխատանքի խորապես ստեղծագործական բնույթը: Այնուհետև, երկու հատուկ բաժիններում հոդվածագիրը զննում է Կոմիտասի երկերի լադային կառուցվածքը և ներդաշնակման նրա սկզբունքները: Կարևոր ու էական է Աթայանի դիտողությունն այն մասին, որ անհրաժեշտ է իր որոշակի կառուցվածքն ունեցող հայկական մոնոդիայի լադերը տարբերել եվրոպական միջնադարյան երաժշտության լադերից, որոնց օգնությանն են դիմել որոշ հետազոտողներ՝ փորձելով բացատրել Կոմիտասի ստեղծագործությունների լադային կազմը: Շատ հետաքրքիր է Աթայանի դիտողությունը Կոմիտասի բազմաձայն երկերում հայ երաժշտության լադերի ոչ օկտավային կառուցվածքի յուրահատուկ բեկման վերաբերյալ[3]: Բուն ներդաշնակության հարցերին նվիրված բաժնում հեղինակը հատուկ առանձնացնում է կվինտակորդների կոմիտասյան օգտագործումը: Նա գտնում է նույնիսկ, թե Կոմիտասի ստեղծագործության մեջ «գոյություն ունի... կվինտային ակորդների մի սիստեմ»[4]: Սկզբունքային նշանակություն ունի Աթայանի առաջադրած դրույթն այն մասին, որ «կոմիտասյան կվինտակորդները իրենց կազմությամբ և բնույթով ծագում են հայկական ժողովրդական երգի լադից, նրա դիատոնիզմից»:

Ռ. Աթայանի հոդվածը, որ ունի մի շարք արժեքավոր կողմեր, այնուհանդերձ, պահանջում է առաջ քաշած որոշ դրույթների էական ճշտում: Այդպիսի ճշտում է պահանջում, օրինակ, հեղինակի ելակետային, հիմնական դրույթը: Ըստ Աթայանի, Կոմիտասի ներդաշնակման հիմքը կլասիկ պարզ ֆունկցիոնալությունն էր, որ բոլորի կողմից ընդունված էր որպես երաժշտական հարմոնիկ մտածելակերպի միակ ճիշտ հիմքը»[5]: Բայց այս մասին ավելի հանգամանորեն կխոսենք ստորև:

Ա. Շահվերդյանի «Կոմիտասը և հայ երաժշտական մշակույթը» հրապարակախոսական կրթով գրված հայտնի մենագրության մեջ երաժշտական ոճի հարցերին մեծ տեղ չի հատկացված: Ինչպես գրում է հեղինակը, «Կոմիտասյան ոճի կենտրոնական խնդիրը՝ բազմաձայնության խնդիրն է... Իր նշանակությամբ վիթխարի այս խնդիրը Կոմիտասը լուծել է բազմազան կոնկրետ ձևերով, և սա հրապուրիչ ու հետաքրքիր մեծ թեմա է

տեսական հատուկ հետազոտությունների համար: Մեր խնդիրն է միայն որոշել Կոմիտասի սկզբունքային դիրքավորումը այս հարցում»:[6]

Շահվերդյանն այդ սկզբունքային դիրքավորումը, որպես կանոն, ստույգ է որոշում, բայց չի կոնկրետացնում: Այսպես, օրինակ, նրա այն միտքը, թե «Կոմիտասի բազմաձայնությունը գործնականորեն լուծում է արդի համաշխարհային երաժշտական մշակույթի առաջավոր փորձի և ազգային արվեստի ինքնատիպ արժեքների, նրա պատկերավոր բովանդակության ու արտահայտչական միջոցների առանձնահատուկ կառուցվածքի զուգորդման բարդ, պատմականորեն կարևոր խնդիրները»[7], մնում է օդում կախված, քանի որ թե՛ այստեղ, թե՛ հետագայում հեղինակը չի ճշտում, թե կոնկրետ ինչ է հասկանում «արդի համաշխարհային երաժշտական մշակույթի առաջավոր փորձ» ասելով: Իսկ առանձին երկերը վերլուծելիս նրա մշտական վկայակոչումները Կոմիտասի արտահայտչական միջոցների «պարզության», «համեստության» վերաբերյալ (առանց համապատասխան բացատրությունների) ցույց են տալիս, թե Շահվերդյանն, ըստ էության, որքան հեռու է այդ «պարզ» արտահայտչական միջոցների իսկական իմաստի բացահայտումից:

Վերջապես, Կոմիտասի ներդաշնակման արվեստին նվիրված հատուկ հետազոտություն է գրել Ռ.Ստեփանյանը: Սակայն նա սահմանափակում է զննվող առարկայի շրջանակները, դիմելով միայն կվինտ և կվարտակորդների օգտագործման հարցերին (ճիշտ է, շատ կարևոր) [8]:

Իսկ որքա՞ն են Կոմիտասի ստեղծագործական մեթոդն ըմբռնելու ուղիները, այն մեթոդ-հանելուկի, որ հեքիաթի հրաշք-թռչունի պես շարունակ փախչում է ձեռքից: Կարծում ենք, որ ճիշտ հասկանալ Կոմիտաս-կոմպոզիտորին՝ նշանակում է նրան այլևս բացառապես նեղ ազգային արվեստագետ չհամարել, և նրան դիտել իր ժամանակի համաշխարհային երաժշտական մշակույթի հետ ունեցած կապերի մեջ:

1868 թվականից, երբ ծնվեց հայկական առաջին օպերան՝ «Արշակ Երկրորդը», և այնուհետև, երբ Կարա-Մուրզան հաստատեց բազմաձայնության սկզբունքը, հայ երաժշտությունը դուրս եկավ մի քանի դար շարունակվող արհեստական մեկուսացումից և մտավ համաշխարհային երաժշտական մշակույթի հունը: Եվ հայ կոմպոզիտորները, ցանկանում էին նրանք այդ թե ոչ, ազգային երաժշտական արվեստի զարգացման հարցերը լուծելով արդեն իսկ դառնում էին լիիրավ անդամներն այն վիթխարի խմբավորման, որի անունն է համաշխարհային երաժշտություն: Հայ կոմպոզիտորներից ոմանք համեստորեն յուրացնում էին այն փորձը, որ վաղուց ի վեր կուտակել էին այդ խմբավորման հին վարպետները, ոմանք մշակում էին դեռևս արգասավոր և կենսահյուրով լի ընդհանուր հողը, իսկ մյուսները հետախույզների, նոր երկիր հայտնագործողների նման լարված ու տազնապով զննում էին անհայտ-անծայրածիր հեռուները, որ մերթ ընդ մերթ լուսավորվում էին փայլակի բոնկումներից: Վերջինների թվում էր Կոմիտասը:

Սակայն, որպեսզի պարզ լինի հետագա շարադրանքը, անհրաժեշտ է թեկուզ համառոտ անդրադառնալ այն հարցերից մի քանիսին, թե ինչպիսի զարգացում էր ապրում եվրոպական երաժշտական միտքը և ինչ վիճակում էր համաշխարհային երաժշտական արվեստն այն շրջանում, երբ Կոմիտասը ստեղծագործական ասպարեզ ելավ:

Դարերի ընթացքում Եվրոպայում կազմավորվեց երաժշտական որոշակի մի համակարգ, որին տեսաբանները մաժորա-մինորային անունը տվեցին: Այդ համակարգը, անշուշտ, կազմավորվեց մի շարք եվրոպական ժողովուրդների պրոֆեսիոնալ (և ժողովրդական) երաժշտական մշակույթի կոնկրետ հատկանիշների հիման վրա: Ժամանակի ընթացքում այդ համակարգի օրինաչափություններն ընդհանրական, ինտերնացիոնալ բնույթ ստացան: «Դրանք ամեննին էլ բացառապես որևէ երաժշտական մշակույթի սեփականությունը չեն», – գրում են Յու.Տյուլինն ու Ն.Պրիվանոն և այնուհետև խոսում «այդ համակարգի ընդհանրության, նրա երաժշտական նորմաների, ընդհանուր հարմոնիայի ստերեոտիպ բնույթի» մասին[9]: Այդ համակարգի օրինաչափությունները առավել լրիվ ի հայտ են եկել, այսպես կոչված, վիեննական դասականների՝ Հայդնի, Մոցարտի, Բեթհովենի ստեղծագործություններում: Բայց 19-րդ դարի եվրոպական պրոֆեսիոնալ երաժշտական արվեստում, հետագայում ևս այդ համակարգը շարունակել է պահպանել իր գերիշխող դիրքը:

Ճիշտ է, այդ հարյուրամյակում տեղի են ունեցել նաև նշանակալից փոփոխություններ՝ համաշխարհային ասպարեզ դուրս եկան նոր, երիտասարդ ազգային մշակույթներ՝ ռուսական, լեհական, չեխական, հունգարական, նորվեգական և այլն: Այս երկրների կոմպոզիտորները, հենվելով ազգային ավանդների և իրենց ժողովրդա-երաժշտական համակարգերի առանձնահատկությունների վրա, նոր ու ինքնատիպ շատ բան ներմուծեցին համաշխարհային երաժշտության զարգացման մեջ: Բայց և այնպես, այդ ողջ պրոցեսը անվերապահ շարունակեց զարգանալ ավանդական մաժորա-մինորային համակարգի շրջանակներում: Ակադեմիկոս Բ.Ասաֆի բանաձևը, որ Գլինկայի մեթոդի էությունը բնութագրում է որպես «ժողովրդա-մոնումենտալ ոճի հայտնաբերում՝ դասականորեն հղկված, ամենաառաջիկալ եվրոպական տեխնիկայի սահմաններում»[10], հիմնական իմաստով ճիշտ է բնորոշում անցյալ դարի ազգային երաժշտական մշակույթներում տեղի ունեցած պրոցեսի էությունը:

Երաժշտական լեզուն ժողովրդական երաժշտական արվեստի տարրերով առավել արմատապես (քան, ասենք, Գլինկայի կամ Շոպենի ստեղծագործության մեջ) բարեփոխելու իրողությունն անգամ, որ բնորոշ է «Հզոր խմբակի» կոմպոզիտորներին և, մասնավորապես, Մուսորգսկուն, չկարողացավ խախտել մաժորա-մինորային համակարգի հիմքերը: Այդ համակարգի հնարավորություններն այնքան ճկուն են ու լայն, որ այն կարողանում է օրգանապես «հարմարվել» տարբեր ազգային երաժշտական մշակույթների պահանջներին, որոշակի տեղ թողնելով նաև ժողովրդական երաժշտական մտածողության բուն առանձնահատկությունները դրսևորելու համար: Ահա թե Յու.Տյուլինն ու Ն.Պրիվանոն, օրինակ, ինչումն են տեսնում ինքնատիպ ազգային

դրսևորումը 19-րդ դարի ռուս կոմպոզիտորների հարմոնիայի մեջ. «Ռուսական հարմոնիայի ազգային ինքնատիպ բնույթը ամենից առաջ ի հայտ է գալիս մելոդիկայի շնորհիվ և դրսևորվում է հարմոնիկ շարադրանքի ֆակտուրայում: Մելոդիական ինտոնացիաները, որ տիպական են ռուս ժողովրդական երաժշտության համար, հատուկ արտահայտիչ նրբերանգ են տալիս սովորական հարմոնիկ դարձվածքներին... Չափազանց բնորոշ է սովորական մաժորա-մինորային համակարգում ակորդների փոփոխական ֆունկցիաների և բնական-լադային դարձվածքների բազմապիսի օգտագործումը»[11]:

Ի դեպ, մաժորա-մինորային համակարգի ավանդական շրջանակներում ստեղծագործել են նաև հայ կոմպոզիտորներից շատերը: Մասնավորապես հիշենք Կոմիտասի նախորդներին՝ Ք.Կարա-Մուրզային և Մ.Եկմալյանին: Բայց այն հանգամանքը, որ նրանք դիմել են երաժշտական արտահայտչականության սովորական ու տարածված միջոցներին, ամեննին էլ չի նշանակում, թե իրավունք ունենք նրանց ստեղծագործությունը համարել ազգային իմաստով ոչ հավասարաթեք կամ ոչ կատարյալ: Իսկ այդպիսի տեսակետ գոյություն ունի (որ առանձնապես ակներև է Ա.Շահվերդյանի աշխատություններում): Այդ կոմպոզիտորների երկերի լրջմիտ վերլուծությունը ցույց է տալիս, որ համաեվրոպական ավանդական համակարգի շրջանակներում (բայց չմոռանալով, այդ համակարգը «դասականորեն հղկված, ամենառացիոնալն» է՝ ըստ Բ. Ասաֆևի զարմանալի դիպուկ բնորոշման), ազգային որոշակի մելոդիկայի և ներդաշնակման յուրահատուկ միջոցների (ոչ սովորական հարմոնիկ հաջորդումներ, բնական-լադային դարձվածքներ, ակորդների ինքնատիպ փոփոխական ֆունկցիաներ և այլն) օգտագործման շնորհիվ նրանք, անկասկած, ստեղծել են ազգային բնույթի երաժշտություն[12]: Այս նույն առումով նրանց ստեղծագործական սկզբունքները շատ քիչ բանով էին տարբերվում նույն շրջանում ստեղծագործող այլազգի կոմպոզիտորների սկզբունքներից:

Ինչպես ցույց է տալիս 19-րդ և 20-րդ դարերի համաշխարհային երաժշտության փորձը, ազգային որոշակիությունը կարող է հանդես գալ հնչյունային նյութի կազմակերպման ամենատարբեր համակարգերում: Եվ այս կամ այն համակարգին դիմելը, վերջին հաշվով, կախված է արվեստագետի ընդհանուր գեղագիտական դիրքորոշումից, նրա գեղարվեստական ձգտումների կոնկրետ ուղղությունից: Օրինակ, Մ. Եկմալյանի «Պատարագի» գեղագիտական կենսունակությունը խոսում է կոմպոզիտորի գտած գեղարվեստական լուծման համոզիչ լինելու մասին: Նուրբ, սահուն, հստակ գծերը, ընդհանուր «իդեալական» հնչողության խիստ զսպվածությունը, սովորական հարմոնիկ աննշմար հաջորդականությունները նպաստում են արտահայտվող զգացմունքների ներքին խտացումը բացահայտելուն, զգացմունքներ, որ խիստ ու կանոնավորված են իրենց արտահայտության մեջ և միաժամանակ վսեմ են ու հոգեպարար (թերևս ոչ այնքան թարմաշունչ ու անմիջական, բայց այստեղ դա չէ գլխավորը): Այսպիսով, «Պատարագում» երաժշտական մտածողության ավանդական նորմաները չեն խանգարում (զուցե և, ընդհակառակն, օգնում են) իր տեսակի մեջ անկրկնելի գեղարվեստական երևույթի ստեղծմանը:

Բայց Կարա-Մուրզան և Եկմալյանը դեռ սկիզբն էին: 20-րդ դարի հայ կոմպոզիտորներից շատերի ստեղծագործական պրակտիկան ևս ցույց տվեց, որ մաժորա-մինորային համակարգի ավանդական նորմաները դեռ երկար ժամանակ շարունակում էին պահպանել իրենց կենսական նշանակությունը: Ավանդական ֆունկցիոնալ կապերի կոնստրուկտիվ, «երկաթե» տրամաբանությունը առանձնապես անհրաժեշտ էր խոշոր ձևերի ազգային երաժշտությունը յուրացնելու համար: Եվ այստեղ, ոչ պատահաբար, առավել անմիջական ազդեցություն ունեցավ Ալ.Սպենդիարյանի ստեղծագործությունը: Այդ մասին պատկերավոր է գրում երաժշտագետ Մ.Ռուխկյանը. «Հատկանշական մի բան. Կոմիտասից ինչքան հեռանում ենք, այնքան մոտենում ենք նրան: Եվ ընդհակառակը, որքան հեռանում ենք Սպենդիարյանից, երաժշտության հոսանքը գնում է այնքան ավելի հեռու: Եվ, եթե Կոմիտասը գագաթ է, մեր զգացմունքներով ու մտքերով կապված ենք նրա հետ, ապա Սպենդիարյանը ցատկատախտակ է, նրանից պոկվում են անվերադարձ, չնայած երախտագիտության զգացումը գնալով ուժեղանում է թե՛ բերկրալից թռիչքի, և թե՛ վայրէջքի պահին»[13]:

Եվ իրոք, մի ուրիշ, նոր աշխարհում Կոմիտասի նվաճած հնչյունային զագաթների օղբ հետագա հայ կոմպոզիտորներից շատերի համար խիստ անսովոր էր: Կոմիտասին հանգեցին բավական ուշ (և դեռ կհանգե՛ն...):

Այնուհանդերձ, արդեն 19-րդ դարի վերջին, արագորեն ակադեմիական դարձող և «հավերժական» ու «անփոփոխ» կանոններով պսակագարդվող ավանդական մաժորա-մինորային համակարգի համապարփակ, անսասան բնույթը ավելի շուտ արտաքին երևույթ էր, քան ճշմարիտ իրավիճակ:

Վագների և ուշ շրջանի Ռիմսկի-Կորսակովի ստեղծագործության մեջ լադա-ֆունկցիոնալ հարաբերությունների խիստ սրումն ու բարդացումը այդ համակարգի հնարավորություններն ասես հասցրին վերջին սահմանին, թեև դուրս չբերեցին այդ սահմանից: Իսկ այնպիսի անսովոր ու արմատական լեզվամտածողությամբ օժտված կոմպոզիտորի ստեղծագործության մեջ, ինչպիսին Մուսորգսկին էր, անմիջականորեն ժողովրդական երաժշտական մտածողությունն արտացոլող արտահայտչական որոշ միջոցներ միշտ չէ, որ օրգանապես միաձուլվում էին երաժշտական մտածողության ավանդական համակարգի օրինաչափություններին, այլ ավելի շուտ մատնանշում էին այդ համակարգից դուրս գալու ուղիները:

Ավանդական երաժշտական համակարգը գրեթե ամենաճոխ ծաղկումն էր ապրում, երբ արդեն զրկվեց իր նախկին գորությունից: Առաջինը, որ հիմնավորապես բարեփոխեց երաժշտական մտածողության տրամաբանությունը, ֆրանսիացի կոմպոզիտոր Կլոդ Դեբյուսին էր: Ժամանակակից գերմանացի երաժշտագետ Շտուկենշմիդտը նրան համարում է «նոր երաժշտության առաջին արմատական կոմպոզիտոր»[14]: «Նա ակորդները դիտում է որպես անկախ հնչյունային երևույթներ և տեղադրում ոչ ֆունկցիոնալ կապակցությամբ, – գրել է Գրետերը: – Նրա համար այլևս ակորդային

կառուցվածքների հիմք չեն ծառայում խրոմատիկ տոնայնությունները, նա դիմում է ամբողջատոն գամմային, պենտատոնիկային և եկեղեցական լադերին: Դրանով իսկ նա վերջականապես երաժշտությունն ազատում է... հարմոնիայի ավանդական ուսմունքի կապանքներից»[15]: Գեղագիտական ուրիշ դիրքերից, բայց փաստորեն նույնն է հաստատում սովետական երաժշտագետ Յու.Կրեմլյովը. «Հարմոնիայի «ռեֆորմը», որ սկսեց Դեբյուսին իր դեռ համեմատաբար վաղ երկերում և որը զարգացավ անշեղորեն, ամենից առաջ խախտեց ֆունկցիաների տրիադայի (տոնիկայի, դոմինանտայի և սուբդոմինանտայի) վրա հիմնված երաժշտական տրամաբանության համակարգի սովորական ֆունկցիոնալ շղթայակցումները: Հարմոնիկ կապակցությունների ամբողջ բազմազանությունը ընդհանրացնելու և ընդամենը մի քանի կենտրոնի շուրջ համախմբելու փոխարեն Դեբյուսին ձգտում էր մանրատվածության, հնարավորին չափ բազմազանելով հարմոնիկ նրբերանգները: Ընդ որում, արմատապես վերախմաստավորվում էին տոնայնությունը, լադը: Խախտվում էին քարացած տրամաբանական ֆիգուրները, իսկ ֆունկցիաների տրիադայի դինամիկան դառնում էր միասնական տոնիկական ֆունկցիայի ստատիկա, ձեռք բերելով, սակայն, մեծաքանակ տարբերակներ ու նրբերանգներ»:[16]

Նույն մենագրության մեջ Յու. Կրեմլյովը հավաստում է. «Առաջին պլան է քաշվում չափազանց նուրբ դիֆերենցված և նրբերանգներով հարստացող գունագեղ համադրությունների համակարգը, որտեղ իրենց դերն ունեն և՛ սուր համադրությունները, և՛ հազիվ նկատելի տարբերությունները: Վալլասն իրավացի է, երբ նման հնարքների ծագումը կապում է արևելյան գործիքային երաժշտության վարիացիոն բնույթի ընկալման հետ»[17]: Ֆրանսիացի հետազոտող Վալլասի[18] մտքի այս վկայակոչումը մեզ շատ հատկանշական է թվում և արժե ուշադրություն նվիրել նրան:

Ավանդական երաժշտական տրամաբանության հիմնովին բարեփոխումը շուտով, հատկապես 20-րդ դարի 10-ական թվականներից, ընդգրկեց շատ երկրներ, էապես փոխելով նրանց ազգային երաժշտական մշակույթների դեմքը: Բայց միաժամանակ, եթե չհաշվենք Շյոնբերգի հիմնադրած դոդեկաֆոնիայի առավել արմատական համակարգը, որ բավական մեծ տարածում գտավ, 20-րդ դարի նորարար կոմպոզիտորներից շատերի (Դեբյուսի, Ռավել, Ստրավինսկի, Պրոկոֆև, Բարտոկ, Յանաչեկ, Հինդեմիտ և ուրիշներ) ստեղծագործության մեջ երաժշտական տրամաբանության նոր օրինաչափությունները լիովին չեն բացասում ավանդական մաժորա-մինորային համակարգի բոլոր տարրերը, այլ փոխակերպված տեսքով ներառվում են իրենց մեջ: Այլ կերպ ասած, հին համակարգի բացասման պրոցեսը դիալեկտիկական բնույթ ունի, պահպանում է համաշխարհային երաժշտական մշակույթի բնական զարգացման համար անհրաժեշտ պատմական ժառանգորդությունը[19]:

Ավանդական երաժշտական համակարգի բարեփոխման ուղիները տարբեր երկրներում, նույնիսկ 20-րդ դարի առանձին առաջատար կոմպոզիտորների ստեղծագործության մեջ, եղել են շատ բանով յուրօրինակ և ոչ նույնական: Բնականաբար, մեր նպատակը չէ այս հարցի քննարկումը: Անհրաժեշտ էր միայն ընդգծել երաժշտական մտածողության

ավանդական նորմաների հեղափոխական բուն փաստը, որ համաշխարհային երաժշտական արվեստի մեջ երևան եկավ 20-րդ դարի սահմանագծում: Այսուհանդերձ, անհրաժեշտ է առանձնացնել նոր արվեստի մի քանի կարևոր հատկանիշներ, որ նախապատրաստել են այդ արվեստի սկզբնավորումը և նրա յուրակերպությունն են բնորոշում:

1. 19-րդ և 20-րդ դարերի սահմանագծում խիստ աճում է հետաքրքրությունը երաժշտական ֆոլկլորի նկատմամբ, որ, ինչ խոսք, միանգամայն նոր ու անսովոր երևույթ չէր: Նորը՝ տարբերակված մոտեցումն էր ժողովրդական արվեստի երևույթներին, ժողովրդական երաժշտության առավել ինքնատիպ շերտերը վեր հանելու ձգտումը: Կոմպոզիտորներն աշխատում էին մի կողմից բացահայտել ժողովրդական երաժշտության «խկական» նմուշները, մյուս կողմից՝ հնարավորին չափ ճիշտ գրառել ժողովրդական մեղեդին, այնպես, ինչպես բուն ժողովրդի մեջ է հնչում, և այս ձգտումը դառնում է յուրօրինակ «ժամանակի խորհրդանշան» ու բացառիկ ներգործություն է ունենում ստեղծագործական պրակտիկայի վրա: Մենք դեռ հնարավորություն կունենանք անդրադառնալու այն սոցիալական-գեղագիտական դրդապատճառներին, որ կյանքի կոչեցին այս առանձնահատուկ երևույթը: Իսկ առայժմ թվարկենք մի քանի նշանակալից փաստեր:

1879 և 1885 թվականներին լույս տեսան Յու.Ն.Մելգունովի «Ռուսական երգեր, որ անմիջականորեն գրառված են ժողովրդի կատարումներից» ժողովածուները և փոքր-ինչ ուշ (1904-1909թթ.) Ե.Է.Լինյովայի՝ իրենց ճշգրտությամբ արժեքավոր «Վելիկոռուսական երգեր ժողովրդական ներդաշնակմամբ» գրառումները (որքան պերճախոս են հենց ժողովածուների խորագրերը): Այս ժողովածուներում առաջին անգամ ներկայացվեց ռուս ժողովրդական երաժշտության այնպիսի մի ինքնատիպ հատկանիշ, ինչպիսին է նրա բազմաձայնությունը: Ա.Դ.Կաստալսկին իր «Ռուս ժողովրդական երաժշտական համակարգի առանձնահատկությունները» հայտնի ուսումնասիրության մեջ, հիմնվելով այդ (և մի քանի ուրիշ) նորագույն հրապարակումների վրա, որ բացահայտում էին ռուս ժողովրդական երաժշտությանը կատարելապես ներհատուկ, անկախ ու ինքնուրույն համակարգը, հանգեց անմիաբար եզրակացության: Նա այն կարծիքը հայտնեց, թե 19-րդ դարի ռուս դասական կոմպոզիտորները «միայն մակերեսորեն, հպանցիկ են անդրադարձել ժողովրդական ստեղծագործությանը և չեն կարողացել թափանցել նրա խորքերը, ընդգրկել լայնորեն, որովհետև տրամադրված նյութը պատահական, ցրիվ, հում է եղել»[20]: Սա, ինչ խոսք, վիճելի չափազանցում է: Բայց միանգամայն իրավացի է Կաստալսկին, երբ ցանկանում է կոմպոզիտորների ուշադրությունը սևեռել ռուս ժողովրդական երաժշտական համակարգի ինքնատիպ հատկանիշները յուրացնելու և ստեղծագործական պրակտիկայում կենսագործելու վրա: Անկախ Կաստալսկու ցանկությունից, նույնն է վկայում 20-րդ դարի ռուս երաժշտության փորձը: Ստրավինսկու՝ համաշխարհային ճանաչում գտած ստեղծագործության արժեքը մեծապես պայմանավորված է այն բանով, որ կոմպոզիտորն իր երկերում զարմանալի թարմ և միանգամայն նորովի է մարմնավորել ռուս ժողովրդական արվեստի տարերքը («Պետրուշկա», «Սրբազան գարուն», «Հարսանիք» և այլն):

Կոմպոզիտորական պրակտիկայում բուն ժողովրդական երաժշտական լեզվի օրենքներն ըմբռնելու այս պրոցեսը նոր ուժով վերածնվեց վերջին տարիներին ռուս երաժշտության մեջ, իրենով պայմանավորելով գրեթե բոլոր գեղարվեստական մեծարժեք նվաճումները (Սվիրիդովի, Սլոնիմսկու, Գավրիլինի և այլոց ստեղծագործությունները):

20-րդ դարի սկզբից Հունգարիայում գեղջկական ժողովրդական երաժշտության ամենահին ու խոր շերտերն սկսեցին հավաքել և ուսումնասիրել Բելա Բարտոկն ու Զոլտան Կոդայը: Այս գործունեության արդյունքները ոչ միայն ազդեցություն ունեցան հունգարական ազգային երաժշտության զարգացման հետագա ամբողջ ընթացքի վրա, այլև միջազգային լայն արձագանք գտան: Ինքը՝ Բարտոկը, ուղղակի գրում էր իր երաժշտական նոր ոճը մշակելու համար բուն ժողովրդական երաժշտությանը անմիջականորեն դիմելու որոշիչ նշանակության մասին. «Գեղջկական երաժշտությանը ծանոթանալն ինձ համար բացառիկ կարևոր նշանակություն ունեցավ, քանի որ օգնեց ազատվելու մաժորա-մինորային համակարգի մենիշխանությունից... Պարզվեց, որ հինավուրց, մեր պրոֆեսիոնալ երաժշտության մեջ չօգտագործվող հնչյունաշարերը չեն կորցրել իրենց կենսունակությունը և հնարավորություն են ընձեռում հարմոնիկ նոր էֆեկտների համար: Այսպիսով, դիատոնիկ հնչյունաշարերի օգտագործումը ի վերջո հանգեցրեց գամմայի բոլոր տասներկու աստիճանների ազատ կիրառմանը... Երբ ես... ծանոթացա Դեբյուսիի երկերին և սկսեցի ուսումնասիրել, զարմանքով նկատեցի, որ նրա մելոսում նույնպես մեծ դեր են խաղում պենտատոնային դարձվածքները, ինչպես մեր ֆոլկլորում է...»

Համանման երևույթներ գտնում ենք նաև Ստրավինսկու ստեղծագործության մեջ: Ասես թե մեր դարաշրջանը միևնույն պահանջներն է ներկայացնում իրարից շատ հեռու գտնվող երկրներին՝ պրոֆեսիոնալ ստեղծագործությունը բարեփոխել ու թարմացնել վերջին հարյուրամյակներում անձեռնմխելի մնացած գեղջկական երաժշտության տարրերով»[21]:

2. 20-րդ դարի երաժշտության արմատական բարեփոխումն ընդգրկեց արտահայտչականության բոլոր բնագավառները՝ մելոդիկա, ռիթմ, հարմոնիա, պոլիֆոնիա, կոմպոզիցիոն կառուցվածք, գործիքավորում, որի հետևանքով ստեղծվեց հնչյունային բուն հյուսվածքի մի նոր որակ: Ի հակադրություն ռոմանտիկական և նեոռոմանտիկական երաժշտության բարդ, հագեցված, հաճախ էլ պճնազարդ հնչյունային կառուցվածքների՝ ընդհանուր ոճը պարզեցնելու, արտահայտման հակիրճության, արտահայտչական միջոցները խնայողաբար օգտագործելու պահանջ առաջացավ: Պրոֆեսիոնալ երաժշտությունը միտումնավոր «հասարակացնելու» ձգտում չէր սա, այլ այն «երիտասարդացնելը» նոր հիմքի վրա: Հետազոտողները 20-րդ դարի երաժշտության այս խիստ բնորոշ միտումի սկզբնավորումն են համարում Շյոնբերգի «Կամերային սիմֆոնիան» (օր. 9) և Ստրավինսկու «Զինվորի պատմությունը», բայց դրա ակունքները կարելի է տեսնել դեռևս Դեբյուսիի և Ռավելի նեոդասական փորձերում:

Կարևոր է նաև ընդգծել, որ բարեփոխումը ոչ միայն վերաբերում էր երաժշտական լեզվի բուն տարրերին (մելոդիկա, ռիթմ, հարմոնիա, պոլիֆոնիա և այլն), այլև էապես փոխում էր դրանցից յուրաքանչյուրի նշանակությունը երաժշտական երկի ստեղծման մեջ: Դեռ դարասկզբին պոլիֆոնիայի խոշորագույն տեսաբան և կոմպոզիտոր Ս.Տանենը գրել է. «Արդի երաժշտության համար, որի հարմոնիան աստիճանաբար կորցնում է տոնայնական կապը, առանձնապես պետք է արժևորվի կոնտրապունկտային ձևերի կապակցող ուժը... Ժամանակակից երաժշտությունը գերազանցապես կոնտրապունկտային է»[22]:

Բազմաձայնության մեծացող դերը, ավանդական հարմոնիայի տիրապետող դիրքերի խախտումը իրենց վրա են սևեռում 20-րդ դարի երաժշտության տեսաբանների և պրակտիկների լարված ուշադրությունը: Այս առթիվ հետաքրքիր դատողություններ է անում Ստրավինսկին. «Հարմոնիան՝ մի ուսմունք, որ վերաբերում է ակորդներին՝ իրենց զուգորդումներով, փայլուն, բայց կարճատև պատմություն ունի: Այդ պատմությունը ցույց է տալիս, որ ակորդները աստիճանաբար կորցրել են հարմոնիկ ձգողականության իրենց անմիջական նշանակությունը և սկսել են կոմպոզիտորին հրապուրել իրենց հնչյունային էֆեկտների փայլով: Ներկայումս հարմոնիայի ասպարեզում նորարարությունն իր ավարտին է հասել: Որպես երաժշտության կառուցման միջոց, հարմոնիան հետագա հնարավորություններ չի ընձեռում: Այսօրվա մարդու ականջը պահանջում է միանգամայն ուրիշ մոտեցում երաժշտությանը: Բնության օրենքներից մեկն այն է, որ մարդիկ, հաճախ, իրենց ավելի մոտ են զգում հեռավոր սերունդներին, քան անմիջապես նախորդ սերնդին: Ուստի այսօր հետաքրքրությունն ուղղված է «հարմոնիայի դարին» նախորդող երաժշտության կողմը: Ռիթմը, ռիթմական պոլիֆոնիան, մեղեդային և ինտերվալային կառուցվածքները՝ երաժշտական հորինվածքների այն տարրերն են, որոնք այսօր ենթակա են մշակման»[23]:

Ավանդական մաժորա-մինորային համակարգի զարգացման ընթացքում մելոդիկան ավելի ու ավելի է ենթարկվում զուտ հարմոնիկ կարգի օրինաչափություններին: Վազների «անվերջ մեղեդիում», օրինակ, մելոդիկան արդեն անմիջապես ելնում է հարմոնիկ հարաբերություններից: Ավանդական համակարգի սահմաններից դուրս գալը նպաստեց, որ երաժշտական արվեստը վերստանա իր՝ խոշոր չափով արդեն կորսված զուտ մեղեդիական օրինաչափությունների նշանակությունը: Վերականգնվեց նաև ինտերվալային կառուցվածքների ինքնակա արժեքը (որ հիշատակում է Ի.Ստրավինսկին), կառուցվածքներ, որոնք այլևս չէին ընկալվում որպես օրինականացված հարմոնիկ համահնչյունների սոսկ օժանդակ տարրեր: Առանձին ինտերվալի ինքնակա արժեքի այս վերականգնման հետ է մեծապես կապված Վեբերնի տեխնիկան:

20-րդ դարի համաշխարհային երաժշտության առաջատար միտումներից մի քանիսի զարգացման՝ այս հարևանցիորեն գծված պատկերն անգամ կարող է շատ բանով պարզել (և, հավանաբար, արդեն պարզել է ուշադիր մասնագետ-ընթերցողի համար) Կոմիտասի

ոճի ըմբռնումը: Իսկ նրա ստեղծագործության վերլուծությունը կնպաստի կոմիտասյան ոճի առանձնահատկությունների ավելի կոնկրետ բացահայտմանը:

Երբ ծանոթանում ենք Կոմիտասի արվեստին, ամենից առաջ, անտարակույս, նկատում ենք կոմպոզիտորի հայացքների աստիճանական զարգացումը ստեղծագործական ոչ այնքան երկար ճանապարհին: Կոմիտասն իր հիմնական գեղագիտական սկզբունքներին հանգել է ժամանակի ընթացքում, երկար ու տառապալի որոնումներից (որի հետքերը պահպանվել են կոմպոզիտորի ձեռագրերում) հետո է միայն, որ գտնվել է այն, ինչ լիիրավ կարելի է դասել 20-րդ դարի գեղարվեստական մտքի առավել արժեքավոր նվաճումների շարքը:

Բայց Կոմիտասի ստեղծագործական առաջին քայլերում արդեն նկատվում է նրա աննահանջ ու ամենակուլ կրքերից մեկը՝ հավաքել, ուսումնասիրել, մշակել ժողովրդական ստեղծագործության նմուշները: Ժողովրդական երգին դիմելու և գեղարվեստորեն մշակելու այս մղումը ինչ-որ չափով նա ժառանգել էր իր նախորդներից՝ Կարա-Մուրզայից, Եկմալյանից, Ն.Տիգրանյանից (ասում ենք՝ «ինչ-որ չափով», որովհետև նրանք ավելի շուտ ոչ թե Կոմիտասի նախորդներն էին, այլ ժամանակակիցները, և նրանց ստեղծագործական ուղիներն ընթացել են գրեթե միաժամանակ):

Կոմիտասի գործունեության սկզբում նրա և մյուս հայ երաժիշտների վերաբերմունքը երաժշտական ֆոլկլորի նկատմամբ շատ բանով նույնական էր: Նա, գեղջկականից բացի, դիմում էր նաև քաղաքային ֆոլկլորին, ազգային-հայրենասիրական երգերին և հին աշուղական արվեստի առանձին նմուշներին: Բայց շատ շուտով Կոմիտասը սկսում է խստորոշ տարբերակել ֆոլկլորի երևույթները՝ առանձնացնելով ազգային «խսկական», անխառն նմուշները, դրանց շարքը դասելով գեղջկական ֆոլկլորը: Իր հայացքները և՛ մամուլում, և՛ ստեղծագործական պրակտիկայում, նա արտահայտում էր բացառիկ հետևողականությամբ, զիջումի ոչ մի տեղ չթողնելով: Այստեղ, ինչ խոսք, նպատակահարմար չէ հանգամանորեն քննել այն չափազանց հետաքրքիր հարցը, որ վերաբերում է Կոմիտասի այդպիսի անզիջում մոտեցմանը հայ երաժշտական ֆոլկլորին: Իր թիկունքում գրեթե երեքհազարամյա պատմություն ունեցող մի այնպիսի ժողովրդի երաժշտական ստեղծագործության համար, ինչպիսին հայ ժողովուրդն է, միայն մեկ բնագավառի, մեկ ճյուղի (որքան էլ դա կարևոր ու բնորոշ լինի) առանձնացումը որպես միակ ընդունելի՝ միշտ էլ խոսում է պրոբլեմի նկատմամբ միակողմանի մոտեցման մասին: Դրանից, ակներևաբար, չի կարողացել խուսափել նաև Կոմիտասը, իր տեսադաշտից դուրս թողնելով ազգային հարուստ աշուղական մշակույթը կամ քաղաքային երգարվեստի և գործիքային երաժշտության նմուշները: Բացի այդ, մեր կարծիքով, Կոմիտասը ժողովրդական երաժշտությանը մոտեցել է ավելի շուտ որպես արվեստագետ, քան գիտնական: Ժողովրդական նյութը հավաքելու ընթացքում արդեն նա գտածը անց է կացրել իր ստեղծագործական համոզմունքների ֆիլտրի միջով[24]: Որոշակիորեն կարելի է ասել, որ ժողովրդական երաժշտության մեջ նա գտել է իր որոնածը: Կոմիտասը ժողովրդական նյութին դիմել է այնպես, որ միշտ զգացվում է ընտրողականություն, հնչունային որոշակի ուղղվածություն՝ որն էլ սրբագրել է այն

անսասան համոզմունքով, որ հայ ժողովրդական երաժշտական ստեղծագործությունը զուտ «ձայնային» (гласовый) բնույթ ունի: Ի՛նչ իմանաս, Կոմիտասի տեսադաշտից դուրս չե՞ն մնացել, նույնիսկ նրա առանձնացրած գեղջկական ֆոլկլորի սահմաններում, ոչ պակաս «իսկական», բայց ուրիշ բնույթ, կառուցվածք, լադա-ինտոնացիոն օրինաչափություններ ունեցող նմուշներ: Ազգային ֆոլկլորագիտության բնագավառում (որ, ավաղ, շատ անմխիթար վիճակում է վերջին տարիներին) գիտական լայնածավալ հետազոտումները միայն կարող են պատասխանել այս և նման բավականաչափ բարդ ու խճճված հարցերին:

Այսպես թե այնպես, անհրաժեշտ է այստեղ ընդգծել բուն փաստը՝ Կոմիտասը տարբերակված մոտեցում է ցուցաբերել ժողովրդական ստեղծագործությանը և հայտնագործել է ժողովրդական երաժշտության իրոք ազգային-ինքնատիպ, գեղարվեստական արժեքով անբաղդատելի վիթխարի մի շերտ: Այս փաստը, իրոք, պատմական նշանակություն ունեցավ հայ ազգային երաժշտության ճակատագրի համար: Կոմիտասի ջանքերի շնորհիվ մոռացումից և անդառնալի կորստից փրկվեց անցյալի ազգային հոգևոր մշակույթի անգնահատելի մարգարիտը:

Սակայն Կոմիտասի գործունեության այս կողմը իրավացիորեն կարող ենք քննել նաև շատ ավելի լայն՝ 20-րդ դարի համաշխարհային երաժշտական մշակույթի զարգացման տեսանկյունից: Վերն արդեն ասացինք, որ ժողովրդական երաժշտության առավել ինքնատիպ խոր շերտերին դիմելը 20-րդ դարի սկզբի երաժշտական արվեստի համար դառնում է յուրատեսակ «ժամանակի խորհրդանշան»: Եվ այստեղ կարևոր է ընդգծել, որ Կոմիտասը՝ որպես և՛ ֆոլկլորագետ, և՛ արվեստագետ, նոր ժամանակների երաժշտության զարգացման այդ չափազանց հատկանշական տենդենցի սկզբնավորողներից մեկը եղավ: Իսկ գեղջկական ֆոլկլորի նմուշների ընդգրկման լայնությամբ (Կոմիտասը գրի է առել մի քանի հազար ժողովրդական մեղեդի), բազմամյա անընդմեջ զննումների հիման վրա ժողովրդական երաժշտության կարևորագույն օրինաչափություններն ըմբռնելու և ստեղծագործական պրակտիկայում կենսագործելու առումով Կոմիտասի գործունեությունը գրեթե աննախադեպ էր իր ժամանակի համաշխարհային երաժշտական մշակույթում: Նրա գործունեությունը թերևս կարելի է համեմատել միայն Բելա Բարտոկի և Զոլտան Կոդալի հարանման գործունեության հետ:

Փարիզում, Բեռլինում և համաշխարհային ուրիշ կենտրոններում Կոմիտասի ելույթները՝ սեփական մշակումների ցուցադրումով, ինչպես հայտնի է, գրեթե սենսացիոն հաջողություն են ունեցել[25]: Այդ հաջողությունը, հավանաբար, պայմանավորված էր ամենից առաջ անսովոր ու հարուստ մեղեդիական նյութով: Ժողովրդական արվեստի խորքերից կորզված մեղեդիների թանկարժեք նմուշները շողշողում էին աշխարհի առաջ իրենց նախաստեղծ թարմությամբ ու բովանդակ գեղեցկությամբ: Բայց Արևմուտքի առավել զգայուն երաժիշտները, որ բարձր էին գնահատում Կոմիտասի երկերը, չէին կարող ուշադրություն չդարձնել նաև ժողովրդական մեղեդիները «մատուցելու» կոմիտասյան բուն մեթոդի վրա, որ շատ բանով տարբերվում էր հնչյունային նյութը կազմակերպելու ավանդական սկզբունքներից և մոտ ու հարազատ էր ժամանակակից

երաժշտական արվեստի նորարարական ձգտումներին: Մյուս կողմից, ինքը՝ Կոմիտասը
ևս, հնարավորություն ունենալով մոտիկից ծանոթանալու առաջավոր երաժշտական
հոսանքներին (ինչպես հավաստում է Շ.Պերպերյանը), պետք է որ ավելի ամրապնդվեր իր
դիրքորոշման մեջ և առավել եռանդով շարունակեր ստեղծագործական որոնումները:

Կոմիտասի երաժշտական ոճի զարգացումը կարելի է պայմանականորեն բաժանել երեք
շրջանի: Նրա ամենավաղ երկերը գրվել են մինչև 1899 թվականը, այսինքն՝ մինչև Բեռլինի
կոնսերվատորիայում երաժշտական կրթությունն ավարտելու տարին: Այդ բոլոր գործերը
ոճական որոշակի ընդհանրություն ունեն: Կոմպոզիտորն այստեղ օգտվում է
եվրոպական տեխնիկայի ավանդական միջոցների շրջանակից՝ նրա ամենանորմատիվ
ու ակադեմիական տեսքով: Գրելառճում՝ հոմոֆոն-հարմոնիկ շարադրանք, սովորական
դասական մաժորա-մինորային համակարգի սահմաններում տոնիկա-դոմինանտային-
սուբդոմինանտային միավորումների պարզ ֆունկցիոնալ կապ, – ահա այն առավել
տիպականը, որով հատկանշվում է Կոմիտասի ստեղծագործության վաղ, ուսանողական
շրջանը: Այս շրջանի երկերի բնորոշ օրինակ է հանրահայտ «Ծիծեռնակ» երգի մշակումը
ձայնի և դաշնամուրի համար: Նույն հունի մեջ է ստեղծված մոնումենտալ, այսպես
կոչված «Բեռլինյան պատարագը», որտեղ Կոմիտասը վստահորեն օգտվում է
գործածական հարմոնիկ միջոցների լայն շրջանակից:[26]

Երկրորդ շրջանի ժամանակագրական շրջանակները այնքան էլ որոշակի չեն: Կարելի է
ենթադրել, թե այն ավարտվում է մոտավորապես 1905-1906 թվականներին: Այս շրջանը
հատկանշվում է կոմպոզիտորի ստեղծագործական եռանդուն գործունեությամբ: Նա
անվերջ որոնում է, տարբեր ուղղություններով շատ բան է փորձում: Այս շրջանում ներքին
վիթխարի շարժումը, բնականաբար, ոճի և նույնիսկ գեղարվեստական արգասիքի
առումով, անհամասեռ պատկեր է ստեղծում: Գլխավորն այստեղ այն է, որ Կոմիտասը
ձգտում է հաստատել իր անհատական ոճը: Նա այլևս պասիվորեն չի հետևում
եվրոպական տեխնիկայի նորմատիվ սկզբունքներին, այլ փորձում է այդ նույն
սկզբունքները մարմնավորել խորապես ստեղծագործաբար, իր բազմաձայն
մշակումներում ավելի նրբորեն ըմբռնել ու արտահայտել ժողովրդական երաժշտական
մտածողության առանձնահատկությունները: Կոմիտասը միաժամանակ հենվում է
ռոմանտիկական դպրոցի, 19-րդ դարում կազմավորված ազգային երիտասարդ
մշակույթների՝ մասնավորապես ռուս երաժշտական մշակույթի, նվաճումների վրա:
Քննադատական աչքով վերանայում է նաև իր նախորդների ու ժամանակակիցների՝
Կարա-Մուրզայի, Ն.Տիգրանյանի, Եկմալյանի և մյուսների փորձը:

Կոմիտասի երկերում դեռևս հաճախ են հանդիպում սովորական ֆունկցիոնալ
հաջորդականություններ: Նա լայնորեն օգտագործում է նաև ակորդների սովորական
տեքստային կառուցվածքը: Բայց նույնիսկ գրելաձևի առավելապես հարմոնիկ եղանակի
դեպքում առանձին ձայների ազատագրման նշանակալից երևույթ է տեղի ունենում. շատ
նուրբ հնարներով Կոմիտասը շեշտում է երաժշտական կերպարների ժողովրդական-
ազգային բնույթը:

Ահա այդ շրջանի գեղարվեստականորեն աչքի ընկնող նմուշներից մեկի՝ «Գութաներգի» խմբերգային մշակումը:

«Գութաներգը» հնչում է հավաք ու դինամիկ: Խմբերգի կերպարային բովանդակությանը համապատասխան, Կոմիտասն ընդգծում է հոգեկան մեծ պոռթկումի, վերելքի արտահայտությունը: Ներդաշնակությունը հիմնականում հանդես է գալիս որպես յուրատեսակ «մեղեդու ռեգոնատոր»[27], ամեն կերպ մեծացնելով նրա հնչողականության ուժն ու դինամիկան:

The musical score is for the song "Ghutsanerg" (The Ghost Song) by Komitas. It is written for four voices (Soprano, Alto, Tenor, Bass) and piano accompaniment. The key signature is one flat (B-flat major), and the time signature is 12/8. The score is divided into three systems. The lyrics are in Armenian and describe a ghostly, haunting melody. The piano accompaniment provides a rhythmic and harmonic foundation for the vocal parts.

System 1:

- Soprano: Զիգ տու քա-շի՛ ա՛յ ե-զը, ա՛-րա հո,
- Alto: Զիգ տու քա-շի՛ ա՛յ ե-զը, ա՛-րա հո, ա՛-րա հո,
- Tenor: Զիգ տու քա-շի՛ ա՛յ ե-զը,
- Bass: Զիգ տու քա-շի՛ ա՛յ ե-զը, հո, ա՛-րա հո,

System 2:

- Soprano: հո, ա՛յ, լու-ծըդ մա - շի, ա՛յ ե-զը, ա՛-րա,
- Alto: ա՛-րա հո, ա՛յ, լու-ծըդ մա - շի, ա՛յ ե-զը, ա՛րա,
- Tenor: հո, ա՛-րա հո, լու-ծըդ մա - շի, ա՛յ ե-զը, ա՛-րա,
- Bass: հո, ա՛յ, լու-ծըդ մա - շի, ա՛յ ե-զը, ա՛-րա,

System 3:

- Soprano: հո, հո, ա՛-րա հո, հո, ա՛-րա հո, հո,
- Alto: հո, ա՛-րա հո, հո, ա՛-րա հո, հո,
- Tenor: հո, ա՛-րա հո, հո, ա՛-րա հո, հո,
- Bass: հո, հո, ա՛-րա հո, հո, ա՛-րա հո, հո,

Այստեղ օգտագործված որոշ հարմոնիկ հաջորդականությունները ցույց են տալիս, որ Կոմիտասն, ակներևաբար, հետևել է եվրոպական երաժշտական մտածողության տրամաբանությանը: Բայց Կոմիտասը միաժամանակ հմտորեն բացահայտում է նաև երաժշտական կերպարի ազգային բնույթը: Արտահայտիչ իմիտացիոն փոխկանչերը ոչ միայն հնչյունապատկերման նշանակություն ունեն՝ առաջացնելով լայն տարածության, մեծաթիվ մարդկանց ներկայության զգացողություն, այլև բազմալադայնության երանգ են ներմուծում, բազմաձայն ֆակտուրայում հիմնական՝ ֆա տոնիկայի հետ մեկտեղ նպաստելով նաև ժողովրդական մեղեդու իսկական տոնիկայի՝ լյա տոնի դրսևորմանը: Բացի այդ, երգի միջին մասում, դեպի լյա մածոր - ռե մինորի ոլորտը կատարված երանգային շեղման մեջ երևում են a, b, cis, d հիմնական տետրախորդով՝ հնչողությամբ վառ ազգային ու ինքնատիպ երկակի լադի տարրերը: Ֆա մածորի T-ի մեջ D-ի սովորական լուծումից հետո (վեցերորդ տակտի վերջում) շատ թարմ ու «ազգային» է հնչում եզրափակող հատվածի ձգտող հարմոնիկ տետրախորդը:

Այդպես, դուրս չելնելով դասական մածորա-մինորային համակարգի հիմնական նորմաների սահմաններից, բայց արդեն որոշակիորեն «չեզոքացնելով» նրա անմիջական ազդեցությունը, Կոմիտասը չափազանց ճկուն ու ստեղծագործաբար օգտվում է նրանից՝ իր գեղարվեստական մտահղացումները մարմնավորելու, կոլորիտով ազգային երաժշտական կերպարներ ստեղծելու համար:

Ավելի մեծ չափով նույնը վերաբերում է այդ շրջանի այնպիսի գործերին, որոնց մեջ գերակշռում է հարմոնիկ-բազմաձայն, երբեմն էլ պարզապես պոլիֆոնիկ գրելաձևը: Ձայների մեղեդիական ակտիվացումը, ժողովրդա-լադային ինքնատիպ բնույթի ընդգծումը հանգեցնում են սովորական ֆունկցիոնալ կապերի «սքողման»: Լինեար մտածողության սկզբունքը (ինչպես և 20-րդ դարի առաջատար կոմպոզիտորներից շատերի ստեղծագործության մեջ) սկսում է կարևոր դեր խաղալ մածորա-մինորի «մենիշխանությունից» ազատագրվելու համար:

Նույն շրջանում պատահում են երկեր, որոնց մեջ պարզորոշ զգացվում է, թե ժողովրդական նյութի համար որքան նեղ ու ճնշող են դառնում ավանդական երաժշտական համակարգի նույնիսկ ընդլայնված ու հարստացված շրջանակները: Խոսքը նշանավոր «Լոռվա հորովելի» մասին է: Այդ հորովելի մեղեդին, ինչպես հայտնի է, համաշխարհային ֆոլկլորում եզակիներից մեկն է իր արտահայտչականությամբ, ինքնատիպ ու բարդ կառուցվածքով: Այս մեղեդու լադա-ինտոնացիոն զարգացման հիմքում ընկած եռատոնային լարված շարքերը ծայրաստիճան անսովոր են եվրոպական ավանդական լսողությանը (նման շարքերի օգտագործումը Եվրոպայում սկսվում է 20-րդ դարի 10-ական թվականների կեսերից, Բարտոկի և Ստրավինսկու ստեղծագործության մեջ, այնուհետև տարածվում է մյուս կոմպոզիտորների շրջանում, հանդես գալով որպես հնչյունային հյուսվածքի լադա-ինտոնացիոն կառուցվածքի լարվածությունն ուժեղացնելու՝ 20-րդ դարի երաժշտության այդ բնորոշ տենդենցի, ամենաէֆեկտիվ եղանակներից մեկը):

Հենց այն հանգամանքը, որ Կոմիտասը դիմել է այդքան անսովոր մեղեդիական նյութի, վկայում է նրա ստեղծագործական բացառիկ համարձակությունը, որ երևում է նաև նրա խմբերգային մշակման մեջ: Լայնորեն օգտագործելով պոլիֆոնիայի հնարները, նա տարբեր ձայներում ստեղծում է տարբերակների ձևով փոփոխված եռատոնային շարքեր, որոնք ավելի են ընդգծում այդ փառահեղ հնչյունային որմնանկարի հնամենի խիստ կոլորիտը: Իսկ լադա-ինտոնացիոն կառուցվածքի բարդացումը երկի առաջին իսկ բաժնում հանգեցնում է խրոմատիկ հնչյունաշարի բոլոր տասներկու տոների ազատ օգտագործման (որ նույնպես եզակի է իր ժամանակի խմբերգային ստեղծագործության մեջ) և առաջ է բերում բազմալադայնության բնորոշ էֆեկտներ: Ավանդական ֆունկցիոնալ կապերն այստեղ հանդես են գալիս, ավելի շուտ, իրենց «ռեժիսուրային» (Յու.Տյուլինի տերմինն է) դերում: Ֆա մաժորի IV, VI ցածր և I աստիճաններում առաջացող մաժորային ակորդները (խոսքը խմբերգի առաջին բաժնի մասին է) խնդիր ունեն մի կերպ կարգավորելու հնչյունների քմահաճ հոսքը: Եվ երաժշտական հոսանքը թեկուզ ինչ-որ չափով ծանոթ հունն ուղղելու այս ձգտումը երբեմն, այնուամենայնիվ, խախտում է բուն երաժշտական նյութի զարգացման տրամաբանությունը և ընկալվում է որպես դեռ մինչև վերջ չհաղթահարված ավանդական պատկերացումների արձագանք: Արդյոք պատճառն այն չէ՞, որ Կոմիտասն իր գործունեության վերջին տարիներին այդ խոշոր երկը չմտցրեց իր համերգների ծրագրի մեջ, այլ գերադասեց մենակատարումը, անձեռնմխելի թողնելով հանճարեղ մարդու ժողովրդական մեկնակերպը: Արդյոք նա մտադրություն չունե՞ր վերադառնալու այդ մշակմանը և նորը ստեղծել (ինչպես վարվեց ուրիշ շատ երկերի հետ): Այս հարցերին առայժմ անհնար է պատասխանել:

Այնուհանդերձ, «Լոռվա հորովելի» նման գործերը հող պատրաստեցին Կոմիտասի հարմոնիկ մտածողության արմատական բարեփոխման համար: Եվ այդ բարեփոխումը շուտով սկսվեց: Կոմիտասի ստեղծագործության նոր շրջանը, որ նախորդի բնական շարունակությունն էր, ամբողջությամբ առած, կարելի է բնորոշել որպես հրաժարումն ավանդական ֆունկցիոնալ մտածողությունից և լադային (մոդալ) հարմոնիայի սկզբունքների հաստատում:

Այս շրջանի որոշ գործեր կարելի է, թերևս, վերլուծել ավանդական հարմոնիայի տեսանկյունից: Բայց նման վերլուծությունը կլինի սոսկ ձևական, որովհետև նրա սահմաններից դուրս կմնա ամենագլխավորն ու կարևորը՝ ստեղծագործության ոգին:

Ասվածի պարզաբանումն սկսենք արտաքին կառուցվածքով շատ պարզ մի գործից՝ «Ա՛խ, մարալ ջան» խմբերգից: Կոմիտասի երկերի ժողովածուի երկրորդ հատորում գետեղված է այդ երգի երեք տարբերակը: Դրանց համեմատությունը չափազանց ուսանելի է:



Այս տարբերակում (թերևս՝ վաղ շրջանից մնացած), որ աչքի չի ընկնում գեղարվեստական մեծ արժանիքներով (մասնավորապես, պայմանավորված միապադաղ, «աշակերտորեն» ըմբռնված քառաձայն ֆակտուրայով), ուշադրություն է գրավում կվինտային ձայնառությունը բաս և տենոր ձայներում: Նման հնարանքի կիրառումը ռուս կոմպոզիտորների, ինչպես նաև Շոպենի, Գրիգի ստեղծագործության մեջ սովորաբար նպաստել է յուրահատուկ «ժողովրդական» կոլորիտի ստեղծմանը: Սակայն այստեղ այդ հնարը բացահայտորեն «չի աշխատում»: Կվինտային ձայնառությունը, միաձուլվելով վերին ձայներին, ընկալվում է որպես սովորական մաժոր եռահնչյուն: Այս օրինակը, բացի այլ կողմերից, հարկավոր է ըմբռնելու համար, թե երաժշտական երկը վերլուծելիս որքան կարևոր է այս կամ այն հնարի օգտագործումը դիտել ընդհանուր ենթատեքստում և թե ինչպես, ըստ էության, այս կամ այն արտահայտչական միջոցի կիրառման մերկ փաստը դեռևս ոչինչ չի նշանակում:

Հաջորդ տարբերակում բավական զարգացած ու հետաքրքիր է ֆակտուրան: Տարբեր ձայներում երևան են գալիս ինքնուրույն կոնտրապունկտային գծեր, որ հարստացնում են շարադրանքը: Հնչողականությունը բազմազանում է նաև բնական ու միքսոլիդիական մաժորի լադային նուրբ խաղը (տե՛ս 11-14 տակտերը): Եվ, այնուհանդերձ, ֆա մաժոր եռահնչյան սովորական հնչողությունը երկրորդ տակտում, այնուհետև նույնքան սովորական D-T կադանսը 3-4 տակտերում ունկնդրի լսողությունն ուղղում են դեպի երաժշտական ավանդական ընկալման հունը:



Ահա մի նոր տարբերակ: Հենց այս տարբերակն է հրատարակել Կոմիտասը 1909 թվականին: Առաջին հայացքից թվում է, թե նախորդների համեմատությամբ սա առավել ևս պարզեցված է և նույնիսկ պարզունակացված: Բայց այդ պարզությունը խաբուսիկ է, որովհետև դա երաժշտական նյութը որակապես բոլորովին ուրիշ կերպ կազմակերպելու ցուցանիշ է:

Վերջին տարբերակն, ասես, առաջնորդում է մեզ դեպի Կոմիտասի ստեղծագործական մեթոդի բուն ակունքները՝ բացահայտելով նրա հիմքերը: Ի՞նչ ուղի է ընտրում կոմպոզիտորը միաձայն ժողովրդական մեղեդու բազմաձայն մշակում ստեղծելու համար. առավել պարզ ու բնական: Նա դիմում է այն բազմաձայնությանը, որ իրապես գոյություն ունի հայ ժողովրդական երաժշտության մեջ: Խոսքը պահված ձայնի, ձայնառության (մեզ մոտ ասում են՝ «դամ պահել» կամ «դամ քաշել») քաջ հայտնի սկզբունքի մասին է.





Իհարկե, ուշագրավն այստեղ բուն փաստը չէ, որ Կոմիտասը դիմել է ձայնառությանը: Դասական երաժշտությունը տառացիորեն հեղեղված է ձայնառության բազմապիսի օգտագործման փաստերով: Այդպիսի շատ օրինակներ կարելի է գտնել նաև հայ պրոֆեսիոնալ երաժշտության մեջ՝ Կոմիտասի նախորդների ստեղծագործություններում:

Սկզբունքային տարբերությունն այն է, որ Կոմիտասի ստեղծագործության մեջ պահված ձայնին դիմելը ոչ թե առանձին, մասնավոր հնար է՝ սովորական մաժորա-մինորի շրջանակներում, այլ դառնում է բազմաձայն հնչյունային հյուսվածքի կազմակերպման հիմնական սկզբունքներից մեկը: Կամ, ուրիշ կերպ ասած, կոմպոզիտորն աշխատում է գտնել բազմաձայնության նոր նորմաներ, որ անմիջականորեն բխում են հայ ժողովրդական բազմաձայնության կենդանի ակունքներից:

Եվրոպական ավանդական բազմաձայնության և հայ ժողովրդական երաժշտության բազմաձայնության սկզբունքների միջև, անշուշտ, էական տարբերություններ կան: Առաջինի հիմնաքարը տերցիային կառուցվածք ունեցող ակորդներն են և նրանց զուգորդումները: Իսկ ժողովրդական երաժշտության պրակտիկայում բազմաձայնությունն առաջ է գալիս երկու՝ պահված ու ձգվող և ազատ շարժվող ձայների փոխներգործությունից: Այդպիսի բազմաձայնության դեպքում, առաջին հերթին, վառ շեշտվում է հիմնական մեղեդիական գծի արտահայտչականությունը: Պահված ձայնն ասես «ցուցադրում է» նրա լադային կառուցվածքը և յուրաքանչյուր տոնի լադաֆունկցիոնալ նշանակությունը: Երկրորդ՝ ուշադրությունը սևեռվում է նաև մերթ նուրբ միահյուսվող, մերթ սուր հնչող տոների զուտ ինտերվալային հարաբերակցությունների

վրա: Հենց սա էլ այդպիսի բազմաձայնությանը յուրօրինակ արտահայտչականություն և հուզական գեղեցկություն է տալիս:

Կոմիտասի մշակման և ժողովրդական բազմաձայնության սկզբունքների կապն ակներև է: Ձայնառությունը պահպանվում է ամբողջ խմբերգի ընթացքում (նախ առաջին բասերի, ապա երկրորդ տենորների ձայներում): Յուրահատուկ ձևով պահպանվում է նաև երկձայն սկզբունքը: Ի տարբերություն ժողովրդական պրակտիկայի, որտեղ մեղեդին ստեղծվում է միաձայն, Կոմիտասը մեղեդին տանում է տերցիա, սեքստա և դեցիմա ինտերվալներով: Սակայն բնականորեն միահյուսվող ձայները (ինչը պայմանավորվում է ընտրված ինտերվալային հարաբերություններով և երգչախմբի միասեռ կազմով) այստեղ փաստորեն ընկալվում են որպես մեղեդիական մեկ գիծ, որը, սոսկ, առավել լիակատար և ստվար հնչողություն ունի՝ Բացի այդ, ֆրագների սկզբում ու վերջում, գրեթե ամենուր պահպանվում է նաև ռեալ հնչող երկձայնը:

Այս տարբերակում՝ նախորդների համեմատությամբ հետաքրքիր է նաև այն, թե կոմպոզիտորն ինչպիսի ջանադրությամբ է խուսափում անմիջականորեն եռահնչյուններին կամ սովորական ֆունկցիոնալ հաջորդականություններին դիմելուց: Թափանցիկ, չափազանց զուսպ ֆակտուրան հնարավորություն է ընձեռում ունկնդրին հասցնելու ժողովրդական հիասքանչ մեղեդու բոլոր նրբագույն երանգները: Միաժամանակ, վարպետորեն տարակերպելով գույները, կոմպոզիտորը հասնում է պատկերավոր անհրաժեշտ արտահայտչականության: Ջարմանալի է, օրինակ, խմբերգի եզրափակիչ մասը: Մեղեդին անցնում է դեցիմայի լայն ինտերվալով: Բասերի թանձր, թավջային հնչողության ֆոնի վրա տենորների վերին ռեգիստրում հնչող հիմնական մեղեդին ասես զրկվում է «նյութականությունից» և սավառնում է օդում, հետզհետե մարելով հեռունեքում...

Ըստ էության «Ա՛խ, մարալ ջան» խմբերգի ներդաշնակությունը զարգանում է միասնական տոնիկական ֆունկցիայի սահմաններում՝ նրա զանազան տարբերակներով ու նրբերանգներով: Միատոնիկայության այս սկզբունքը, որ անկասկած բխում է ժողովրդական բազմաձայնության տրամաբանությունից, դյուրությամբ նկատվում է նաև Կոմիտասի ուրիշ շատ երկերում[28]: Կոմպոզիտորը միաժամանակ ծայրաստիճան բազմազանում է այդ սկզբունքի օգտագործումը, դրսևորելով իր անսպառ երևակայությունն ու հնարամտությունը:

«Միատոնիկայության» սկզբունքը հետաքրքիր է կիրառվել, օրինակ, ձայնի և դաշնամուրի համար գրված «Էս առուն» երգում.



Մեկ պահված տոնից, ինչպես ընդունված է ժողովրդական նվագաձայնի պրակտիկայում, այստեղ ասես ծնվում է մի ամբողջ հարմոնիկ համահնչյուն՝ բազմակազմ տոնիկա (եթե օգտվենք ընդունված տերմինաբանությունից): Այդ տոնիկան իր մեջ է ներառում մեղեդու հնչյունաշարի բոլոր տոները: Դրանց միացած է նաև ֆադիեզը, որ ոչ միայն չի հակասում մեղեդու լադային կազմակերպմանը, այլև, ընդհակառակը, ավելի վառ է ընդգծում նրա հիմքում ընկած պենտատոնիկան: Պեղալով[29] պահված հիմնահնչյունը միավորում է առաջ եկած տարբեր պենտատոնային համահնչյունները: Ջուրկ լինելով լարված կիսատոնային ձգողականությունից, դրանք ազատ «խաղում են», «հոսում», ստեղծելով թեթև, թափանցիկ հնչյունային ֆոն, որ այնպես համապատասխանում է երգի պատկերային բովանդակությանը: Պենտատոնային հնչյունաշարի վրա կառուցված համահնչյունների գունագեղ «խաղը», ինչպես հայտնի է, օգտագործել է նաև Դեբյուսին՝ հասնելով կոլորիստական անկրկնելի էֆեկտների:

Կոմիտասի ստեղծագործության մեջ համահնչյունները չափազանց բազմազան են և՛ քանակապես, և՛ որակապես՝ երկհնչյուններ, քառահնչյուններ, հնգահնչյուններ և այլն: Կարևոր է ընդգծել, որ Կոմիտասը լիովին ազատվում է տերցիային կառուցվածք ունեցող ավանդական ակորդների «մենիշխանությունից»: Նա սիրով օգտագործում է կվարտային, կվինտային կառուցվածք ունեցող համահնչյուններ, չիրաժարվելով, ի դեպ, նաև տերցիային համահնչյուններից, սակայն հաղորդելով դրանց բոլորովին այլ բնույթ (դա մենք ցույց կտանք «Անտունի» երգի օրինակով): Եթե, այնուամենայնիվ, փորձ լինի Կոմիտասի ստեղծագործության մեջ գտնելու ակորդների կազմակերպման համակարգ, ապա, թերևս, դա կարելի է բնորոշել որպես ակորդների ժողովրդա-լադային կամ բնական-լադային համակարգ:

Այստեղ, օրինակի համար, դիմենք «Քելե, քելե» երգի նախանվագում գոյացող ակորդին: Այն, հավանաբար, կարելի է համարել սովորական դո-մաժորային եռահնչյուն՝ ոչ ակորդային ռե հնչյունով: Կարելի է համարել նաև տերցիային կազմության ակորդ (նոնակորդ)՝ առանց սեպտիմայի (դո, մի, սոլ, ռե): Վերջապես, կարելի է բացատրել նաև կվինտակորդների համակարգի մեջ (դո, սոլ, ռե, լյա-ն՝ բաց թողած, և մի): Սակայն բոլոր այս բացատրությունները, վերջ ի վերջո, ձևական կլինեն, քանի որ չեն բացահայտում երևույթի էությունը: Իսկ ճշմարտությունն այն է, որ այդ ակորդը անմիջականորեն

կապված է մեղեդու լադային կազմության հետ և հանդիսանում է նրա ուղղահայաց «ամփոփումը»: Այդ սկզբունքը վերափոխված ձևով հետագայում լայնորեն կիրառում է Ռոմանոս Մելիքյանը արդեն ոչ միայն դիատոնիկ, այլ նաև խրոմատիկ համակարգում[30].



Հետաքրքիր է, որ լադի վերին տերցիային ոլորտում ծավալվող մեղեդիում (երգի վերջում հաստատվող հիմնական տոնիկան լյա - եռականն է) բոլոր հնչյունները գրեթե իրավահավասար են և ինքնուրույն ֆունկցիոնալ կախվածության տեսակետից, և դրանցից յուրաքանչյուրը կարող է դառնալ հենակետ: Հենց տոնիկական համահնչյունն էլ իր մեջ է «ներառում» բոլոր այդ չորս հնչյունները: Ընդգծենք նաև, որ նախանվագի առաջին և վերջին հնչյունները «կանխագուշակում են» երգի մեղեդու սկզբնական հատվածի առաջին և վերջին հնչյունները (դո և սոլ):

Լ.Մազելն իր աշխատություններից մեկում, խոսելով տերցիային սկզբունքի կազմավորման նախադրյալների մասին, տերցիան կարևորում է որպես մաժորային կամ մինորային լադային շեղման ինդիկատոր (որոշիչ)[31]: Այստեղ երևում է մաժորա-մինորային համակարգում ակորդների տերցիային կառուցվածքի կիրառման բնական ու օրինաչափ լինելը: Իր գործերն ստեղծելով մի ուրիշ համակարգի շրջանակներում, Կոմիտասը, բնականաբար, հրաժարվում է տերցիային սկզբունքի «մենիշխանությունից»: Սակայն հետաքրքիր է, որ Կոմիտասի ներբերած նոր համահնչյուններում լիովին պահպանվում է օգտագործված այս կամ այն լադի (իհարկե, արդեն ոչ մաժորի և ոչ մինորի) բնույթը որոշող նրանց կարևոր դերը: Հայտնի է, օրինակ, թե հայ ժողովրդական երգերի լադի բնույթը որոշելիս ինչ մեծ նշանակություն ունի դիմող ձայնը: Հաճախ հենց վերջինիս այս կամ այն տեղադրությունն է (նույնիսկ հիմնական հնչյունաշարի նույնական լինելու դեպքում) պայմանավորում մեղեդու լադային կառուցվածքի ինքնատիպ բնույթը:

Կոմիտասի օգտագործած համահնչյունները պարզորոշ ի հայտ են բերում հայ ժողովրդական երաժշտության լադային կառուցվածքի այս բնորոշ առանձնահատկությունը: Ավելի ճիշտ, դրանց կազմավորման նախադրյալ եղավ ժողովրդական լադային մտածողության հենց այդ առանձնահատկությունը: Ինչպես վկայում են բազմաթիվ օրինակներ, Կոմիտասի երկերում կվինտային, կվարտային,

տերցիային տարբեր համահնչյունների ի հայտ գալը, որպես կանոն, անմիջականորեն կապված է ժողովրդական մեղեդիների լադային կոնկրետ կառուցվածքի հետ, այն դիրքի հետ, որ նրանցում գրավում է դիմող ձայնը (տե՛ս «Հաբբեանի» կրկնեգը, «Ալագյազ Բարձր սարին», «Զինար ես» և ուրիշ երգերի սկիզբը):

Այս առումով վառ օրինակ է նաև «Անտունին», ուր սկզբնական տերցիային համահնչյունը ծնվում է որպես մեղեդու առաջին ֆրազի հիմնական ու դիմող ձայների համահնչողություն: Այս համահնչյունը պակաս նոր ու ինքնատիպ չէ (և սա ուզում ենք հատուկ ընդգծել), քան կվինտային ու կվարտային համահնչյունները: Նորն ու ինքնատիպը, ինչ խոսք, ոչ թե բուն, եթե կարելի է ասել, «ֆիզիկական» հնչողության մեջ է, որ ի տարբերություն կվարտային ու կվինտային ներդաշնակությունների, շատ բնորոշ է եվրոպական ավանդական երաժշտությանը, այլ նրա օգտագործման սկզբունքի մեջ: Տերցիային համահնչյունն այստեղ հանդես է գալիս ոչ թե որպես սովորական մաժոր կամ մինոր եռահնչյունի «բեկոր», թերի տեսակ, այլ ունի ինքնակա նշանակություն: Պատահական չէ, որ հենց այդ համահնչյունը յուրօրինակ լայտհարմոնիա է դառնում «Անտունի» երգի նվագակցության մեջ, զգալիորեն որոշելով վերջինիս ինքնատիպ բնույթը: Հիանալի է նաև առաջացած հարմոնիայում բասերի և վերին ձայների լայնատարած դիմակայությունից ստացվող հնչյունային էֆեկտը՝ խորունկ, թնդաձայն օկտավաներն ամենացածր հնչամասում (զանգի զարկերի նման) և օդում կախվող դրանց հեռավոր արձագանքները:

Ասենք նաև, որ հարմոնիկ մտածողության ավանդական նորմաների այս արմատական վերաիմաստավորումը երբեմն հանգեցնում է ապշեցուցիչ և նույնիսկ պարադոքսալին արդյունքների: Առաջին հայացքից «Անտունին» ավարտվում է լիահնչյուն լյա-մաժոր ակորդով: Այս բանն ասես նույնիսկ իրավունք է տալիս Ա.Շահվերդյանին՝ առաջ քաշելու «Անտունիի» «մաժորայության» դրույթը և Կոմիտասի գլուխգործոցը համեմատելու Հենդելի «Մամոն» օրատորիան եզրափակող մաժոր սգո քայլերգի հետ[32]: Սակայն այս ամենը այնքան էլ ակնառու չէ: Լադային կազմի մի ուրիշ համակարգի մեջ (ոչ եվրոպական) ներմուծված մաժոր եռահնչյունները բոլորովին էլ սովորականի պես «մաժորային» չեն հնչում (և այստեղ է պարադոքսը, թեկուզ և բացատրելի): «Անտունիի» եզրափակող լյա-մաժոր ակորդը միայն իր արտաքին «հնչյունաթաղանթով» է հիշեցնում սովորական կայուն մաժոր տոնիկան: Փաստորեն նրա ֆունկցիոնալ դերը, արտահայտչական իմաստը բոլորովին այլ է: «Լյա, դո-դիեզ, մի» ակորդը հնչում է տերցիային մեղեդիական դիրքով, կվինտան՝ մի-ն, այստեղ ընկալվում է որպես օժանդակ տոն, ռեալ հնչողության մեջ գերակշռում են լյան և դո-դիեզը (երգի լայտհարմոնիան), ընդ որում դո-դիեզ տոնը երգի լադային կառուցվածքում ամենաանկայուններից ու լարվածներից է: Հենց այս հանգամանքով էլ պայմանավորվում է այդ համահնչյունի լարված և նույնիսկ «դիստոնանս» բնույթը (չնայած ակուստիկական տեսանկյունից կոնստոնանս է): Դա ասես հուսալքման, ցաված հոգու հառաչ է: Եվ այդ համահնչյունը, ինչ խոսք, ոչ մի ընդհանուր բան չունի սովորական մաժոր տոնիկայի հետ.

Ի դեպ, խոր հուսահատություն, հոգեկան ամայացման զգացում արտահայտելու համար Կոմիտասը նման հնար է կիրառում «Ծիրանի ծառ» երգի վերջավորող հատվածում, մեղեդին ավարտելով երկակի (հարմոնիկ) լադի վերին ձգտող տոնի վրա.

Piu lento, con dolore

Եվ, վերջապես, կոմիտասյան բազմաձայնության մի ուրիշ սկզբունքի մասին, որ թերևս,

«տոնիկայնության» սկզբունքի հետ մեկտեղ, հիմնորոշ նշանակություն ունի: Այս կամ այն չափով այդ սկզբունքը կիրառվել է նաև նախորդ օրինակներում:

Կոմիտասի բազմաձայնությունն ասես բնականորեն բխում է ժողովրդական երգի լադա-
ինտոնացիոն կառուցվածքից: Մեղեդիական հորիզոնականը օրգանապես
փոխակերպվում է բազմաձայն ուղղահայացի: Օրինակները շատ են՝ բառացիորեն ցրված
Կոմիտասի ստեղծագործական հասուն շրջանի ամեն մի տողում:
Կվարտ- և կվինտակորդները, տարբեր կառուցվածքի պենտակորդների մաքուր,
թափանցիկ հնչողությունը առանձնահատուկ հնչունային մթնոլորտ է ստեղծում
Կոմիտասի երգերի դաշնամուրային նվագակցության մեջ՝ լուսավոր, նուրբ, հանգիստ
հովվերգական: «Հատկանշական չէ՞, արդյոք, – գրում էր Յու.Կրեմյովը, – որ փնտրելով
լուսավորը և կատարյալը, Դեբյուսին ձգտում էր դեպի պարզ ու անպաճույճ
ժողովրդական երգն ու գործիքային նվագը»[33]:

Այդ բառերն ամբողջովին կարող են վերաբերել նաև Կոմիտասին: Ավելացնենք միայն, որ
այդ «լուսավորը և կատարյալը» նա փնտրում էր ոչ միայն հենց ժողովրդական
մեղեդիների մեջ, այլև պրոֆեսիոնալ երաժշտության միջոցներով դրանց մատուցման
կերպի մեջ:

Մեղեդու՝ հարմոնիկ ուղղահայացի «փոխակերպման» ընթացքում, երբեմն
պենտակորդների հետ մեկտեղ գոյանում են հետաքրքրական, անսովոր, փափուկ
դիատոնիկ «կլաստերներ» հիշեցնող համահնչյուններ (տե՛ս «Ալագյազ»[34] երգի
վերջավորությունը).

[Allegro moderato]

Ջութ կու - գա Վե - րին սա - րեմ,

սարն ու - լո - րե - րեմ,

Լարված հնչող կլաստերի օրինակ ենք գտնում «Անտունի» երգում: Ուշադրության են արժանի այստեղ գոյացող ամբողջատոն հաջորդականությունները (տե՛ս «Անտունի» երգի այստեղ բերված օրինակներից առաջինը):

Կոմիտասի գործերում նվագակցությունը ոչ միայն ընդգծում է դիմող ձայների հատուկ դերը, այլև, անհրաժեշտության դեպքում, նրբորեն ի հայտ է բերում նրանց յուրօրինակ «պայքարը» հանուն առաջնության: Այս ամենը նպաստում է լադի՝ նրբերանգներով հարուստ ներքին «կյանքի», ժողովրդական մեղեդու լադային զարգացման ավելի լրիվ բացահայտմանը.

Allegretto

Էր. զիմ լույսակ աամ լող - վոր - չուն. քո - մա քո - մա

Էր: Ո՛չ է-ամ, ո՛չ հաղ - նն-ցաղ, զո - մա քո - մա

Եթե նոր կառուցվածք ունեցող համահնչյունների կազմավորման նախադրյալը, ինչպես ասվեց, հայ ժողովրդական երաժշտության լադային համակարգին հատուկ՝ հիմնական և դիմող ձայների հարաբերակցումն է, ապա հետագայում այդ համահնչյուններն ասես «ազատագրվում են», և Կոմիտասը դրանք հաճախ օգտագործում է միանգամայն ազատ, անկախ նրանց «ծագումից» (տե՛ս «Քելեր, ցուլեր» երգը դաշնամուրի նվագակցությամբ):

Մեղդիկայում հանդիպող միևնույն լադային հաջորդականություններից ակորդային կոմպլեքս ստեղծելու սկզբունքը լայն կիրառում գտավ 20-րդ դարի երաժշտության մեջ և փաստորեն դարձավ ոճական ամենաբնորոշ հատկանիշներից մեկը այնպիսի ականավոր կոմպոզիտորների ստեղծագործության մեջ, ինչպիսիք են, ասենք, Դեբյուսսին, Սկրյաբինը, Բարտոկը, Պրոկոֆևը, Ստրավինսկին: Այստեղ ակամա չենք կարող առանձնապես չիժել Կոմիտաս – Բարտոկ զուգահեռը:

«Միշտ հին մեղեդիական սուբստանցի նոր ընկալման բոլոր կողմերը պետք է ստեղծեն այնպիսի տպավորություն, որ մեղեդին լիովին ամբողջական է բոլոր «լրացումներով» հանդերձ... Չկա ավելի բնական բան, քան երբ փորձում ես համաժամանակյա լսել այն, ինչը համագոր ընկալվում է հաջորդական հնչողության մեջ... Մեր արևելաեվրոպական գեղջուկ երաժշտության մեղեդիները ներդաշնակման բոլորովին նոր հնարավորություններ են բացահայտում... Մեր հինավուրց ժողովրդական մեղեդիներում կվարտային թռիչքների հաճախակի կիրառումը դրդեց մեզ օգտվելու կվարտային կառուցվածքի ակորդներից: Առիթը նույնն է՝ մենք համահնչյունության հանգեցրինք այն, ինչ հնչում էր հաջորդաբար»[35]: Սրանք Բարտոկի խոսքերն են: Բայց նույնը կարող էր

ասել նաև Կոմիտասը: Համենայն դեպս, նրա ստեղծագործական պրակտիկան ցույց է տալիս, որ երկու կոմպոզիտորներն էլ այս հարցում նույն հայացքներն են ունեցել:

Մեղեդիական հորիզոնականը հարմոնիկ ուղղահայացի փոխակերպելու սկզբունքը Կոմիտասը կիրառում է մեծ հետևողականությամբ: Այդ սկզբունքը կարելի է բնութագրել իբրև «լադա-ակորդ» սկզբունք: Մելոդիկայում հանդիպող լադային բնորոշ հաջորդականությունները հանդես են գալիս նաև որպես զարգացած բազմաձայն հյուսվածքի բաղկացուցիչ տարրեր: Մելոդիկայի և հարմոնիկ նվագակցության այս փոխթափանցումն ու փոխկապակցությունը ամբողջ երկի ինտոնացիոն բացառիկ միասնության հիմք են դառնում: Կարելի է ասել, որ Կոմիտասի լավագույն երգերի յուրաքանչյուր «երաժշտական բջիջում» զգում ենք ժողովրդական մելոսի կենդանի զարկերակի տրոփյունը: Այստեղ է կոմիտասյան ռճի զարմանալի անաղարտության գաղտնիքներից մեկը, անաղարտություն, որ նկատում է նույնիսկ նրա ստեղծագործությանն անձանոթ ունկնդիրը:

Կոմիտասը, որպես կանոն, խուսափում է ակորդային կոմպակտ ֆակտուրայից, հարմոնիկ ուղղահայացը հատուկ ընդգծելուց: Կոնտրապունկտային զարգացած հյուսվածքը, առանձին ձայների ինքնուրույնությունը՝ բնորոշ հատկանիշներ են ոչ միայն նրա խմբերգերում, այլև ձայնի ու դաշնամուրի համար գրված երգերի զգալի մասում: Կոմիտասի համար տիպական՝ մտածողության պոլիֆոնիկ բնույթով կարելի է բացատրել նաև իր ստեղծագործություններում հանդիպող պոլիռիթմիայի, պոլիլադայնության, պոլիտոնայնության չափազանց հետաքրքիր և յուրատիպ օրինակները (տե՛ս «Սարերի վերով գնաց»[36], «Երի, երի, ջան»[37] և այլ երգերի խմբերգային մշակումները):

Միանգամայն առանձին թեմա է խմբերգային «գործիքավորման» հարցը Կոմիտասի երկերում: Այս ասպարեզում Կոմիտասը ոչ միայն դեռևս անգերազանցելի է հայ ազգային երաժշտության մեջ, այլև կարող է իրավամբ համարվել մեծագույններից մեկը համաշխարհային խմբերգային արվեստի վարպետների մեջ: Փորձ չանելով թափանցել այդ հատուկ թեմայի մանրամասների մեջ, նշենք սոսկ մի էական կողմ՝ ձայների տեղաբաշխումը Կոմիտասի խմբերգային պարտիտուրներում: Եվրոպական երաժշտության պրակտիկայում ամուր հաստատված կանոնն ասում է՝ նվագախմբում և երգչախմբում ակորդը, «բնական» հնչելու համար, կառուցվում է ակուստիկական սանդղակի համաձայն՝ ներքևում հնչունների լայն, վերևում՝ խիտ տեղաբաշխումով: Կոմիտասը համարձակորեն խախտեց նաև այս կանոնը: Ակորդի սովորական տեղադրման հետ մեկտեղ, նա լայնորեն կիրառում է նաև հակառակ տեղաբաշխումը՝ ներքևում խիտ և վերևում լայն (տե՛ս «Գարուն ա», «Լուսնյակն անուշ», «Մոնա յար», «Շորորա, Անուշ» և ուրիշ խմբերգային մշակումներ): Եվ նրա խմբերգային հյուսվածքն ասես միանգամից լուսավորվում է, լցվում օդով, տարածությամբ: Համեմատության համար ասենք, որ նվագախմբային պարտիտուրում ձայների նման տեղաբաշխման է հանգում նաև Ստրավինսկին, և սա դիտվում է որպես ամենանշանակալից փաստերից մեկը նրա նվագախմբային մտածողության զարգացման մեջ[38]:

Ակնառու են Կոմիտասի նորարարական սկզբունքները, որ բացահայտվում են ոչ միայն հայ ազգային երաժշտության շրջանակներում, այլև առավել լայն պլանով՝ համաշխարհային երաժշտական արվեստի զարգացման հեռանկարում: Կոմիտասը մեծ է, թերևս, ամենից առաջ նրանով, որ սեփական՝ ազգային մշակույթի առավել հրատապ խնդիրների լուծումը կարողացավ բարձրացնել 20-րդ դարի ամբողջ երաժշտական արվեստի առջև ծառացած պրոբլեմների լուծման մակարդակին: Ընդ որում, նա ոչ միայն հենվում էր իր նախորդների և ժամանակակիցների փորձի ու նվաճումների վրա, այլև նրանց շարքում էր, ովքեր անմիջականորեն երաժշտական մտածողության որակապես նոր հիմքերն էին դնում:

[1] Հոդվածն արտատպված է «Ժամանակակիցները Կոմիտասի մասին» ժողովածուում, Երևան, 1960, էջ 81-100:

[2] ՀՍՍՀ ԳԱ «Տեղեկագիր» (հասարակական գիտություններ), Երևան, 1949, N 9:

[3] Յ.Տե՛ս նշված հոդվածը, էջ 99-102:

[4] Նշված հոդվածը, էջ 105:

[5] Նշված հոդվածը, էջ 112:

[6] А.Шавердян. Комитас и армянская музыкальная культура, Ереван, 1956, с. 291-292.

[7] Նշված հոդվածը, էջ 291:

[8] Р.Степанян. О национальном своеобразии гармонии в творчестве армянских композиторов (ձեռագիր): Տե՛ս նաև նրա հոդվածը «Советская музыка» հանդեսում, 1962, N 4, էջ 43-47:

[9] Ю.Тюлин и Н.Привано. Теоретические основы гармонии, Л., 1956, с. 24.

[10] Б.В.Асафьев. Избранные труды, т. I, М., 1952, с. 13-14.

[11] Ю.Тюлин и Н.Привано. Теоретические основы гармонии, с. 13-14.

[12] Այս բանը շատ համոզիչ բացահայտել է Կ.Խուդաբաշյանը իր «Многоголосие на раннем этапе развития армянской профессиональной музыки» ձեռագիր աշխատության մեջ: Տե՛ս նաև նրա հոդվածը «Особенности гармонии в произведениях М.Екмаляна», «Բանբեր Երևանի համալսարանի», 1968, N 2, էջ 221-233:

[13] «Սովետական արվեստ», 1968, N 3, էջ 25:

[14] Մեջբերված է Մանֆրեդ Գրետերի “Neue Musik” գրքից, Ֆրանկ-ֆուրտ, Համբուրգ, 1955, էջ 18:

[15] Նույն տեղում:

[16] Ю.Кремлев. Клод Дебюсси, М., 1965, с. 729-730.

[17] Նույն տեղում, էջ 303-304:

[18] L.Vallas, Claude Debussy et son temps, Paris, 1956, էջ 271:

[19] Պետք է, սակայն, նկատել, որ այս դրույթը ոչ մի ընդհանուր բան չունի սովետական երաժշտագիտության մեջ մինչև այժմ տարածված այն տեսակետի հետ, որ իբր մաժորա-մինորային երաժշտական համակարգը 20-րդ դարի երաժշտության մեջ նույնպես շարունակում է պահպանել իր համընդհանուր, հիմնարար նշանակությունը: Մեր կարծիքով, այս պահպանողական տեսակետը ի վիճակի չէ ըմբռնելու և, առավել ևս, բացատրելու 20-րդ դարի երաժշտության բազմաթիվ, այդ թվում՝ նաև ամենաբնորոշ երևույթները, որ ծագել են որակապես այլ հիմքի վրա:

[20] А.Кастальский. Особенности народно-русской музыкальной системы, М., 1961, с. 19.

[21] Барток. Автобиография. Առաջին անգամ հրապարակվել է 1921 թ. հունգարական «Musikblätter des Anbruch» հանդեսում, ռուսերեն հրապարակվել է «Советская музыка» հանդեսում, 1965, N2, էջ 94-96 (ընդգծումը մերն է - Գ.Գ.):

[22] С.Танеев. Подвижной контрапункт строгого письма. Лейпциг, 1909, с. 6.

[23] I.Stravinsky, R.Craft. Conversations with Igor Stravinsky. Doubleday and Company, New York, 1959, p. 121:

[24] Նույն կարծիքն ունեն այս հարցով զբաղվող հետազոտողները: Տ՛ես, օրինակ, Ռ.Աթայանի նշված հոդվածը, էջ 87:

[25] Ճիշտ է, Կոմիտասի գործունեության միջազգային արձագանքը կարող էր լինել, ինչ խոսք, շատ ավելի նշանակալից, եթե նա հանդես գար ոչ որպես միայնակ էնտուզիաստ: Ցավոք, պատմական անբարենպաստ պայմանները, պետական աջակցության և որևէ նյութական ապահովության բացակայությունը հնարավորություն չէին տալիս, որ լրիվ ուժով բացահայտվեն Կոմիտաս-կոմպոզիտորի հնարավորությունները, և արտաքին աշխարհի համար գրեթե ան-նկատ դարձրին Կոմիտաս-ֆոլկլորիստի գործունեության տիտանա-կան թափը: Այն, ինչ գիտեր արտաքին աշխարհը Կոմիտասի մասին՝ նրա կենդանության օրոք, հիմնվում էր միայն նրա ստեղծագործական հարուստ ժառանգության մի աննշան մասի վրա:

[26] Կոմիտաս. Երկերի ժողովածու, հ.8, Հոգևոր ստեղծագործություններ, խմբագիրներ՝ Ռ.Աթայան, Գ.Գյոդակյան, Դ.Դերոյան, Երևան, 1998, էջ 195:

[27] Այստեղ օգտագործում ենք ակադեմիկոս Բ.Ասաֆնի բնորոշումը, որ բացահայտում է հարմոնիայի գլխավոր դերերից մեկը:

[28] ԻՆչպես վերևում ասացինք, այս նույն սկզբունքն է, որոշ հետա-գոտողների կարծիքով, ընկած Դեբյուսիի ներդաշնակության հիմքում: Վալլասը, որ Դեբյուսիի ներդաշնակության այս սկզբունքի ծագումը կապում էր արևելյան երաժշտության հետ, ինչպես տեսնում ենք, բոլոր հիմքերն ուներ այդ բանի համար: Իրոք, մի շարք արևելյան մշակույթների, այդ թվում և հայ ժողովրդական երաժշտության մեջ, այդ սկզբունքով է որոշվում ժողովրդական բազմաձայնության ինքնատիպությունը:

[29] Կոմիտասի դաշնամուրային նվագակցություններում պեղալի օգտագործման կարևոր նշանակության վրա առանձնակի ուշադրություն է դարձրել Ռ.Ստեփանյանը վերոհիշյալ աշխատանքում (տե՛ս ծանոթ.8): Իրոք, պեղալը շատ կարևոր տարր է կոմիտասյան ստեղծագործությունների առանձնահատուկ հնչյունային տարածքի ստեղծման գործում: Այն ոչ միայն մեկ ամբողջության մեջ միավորում է հարմոնիկ համահնչյունների բազմությունը, այլ և նրբորեն օգտագործում է տարբեր հնչյունային երանգների «խաղը» (դասական օրինակ են Կոմիտասի դաշնամուրային պարերը):

[30] Г.Геодакян. Пути формирования армянской музыкальной классики. Ереван, 2006, с. 153-163.

[31] Л.Мазель. К дискуссии о современной гармонии, в сборнике: «Теоретические проблемы музыки XX века», вып. 1, М., 1967, с. 13-15.

[32] А.Шавердян. Комитас, Ереван, 1956, с. 267-268.

[33] Ю.Кремлев, նշվ. աշխ., էջ 618:

[34] Կոմիտաս, Երկերի ժողովածու, հ. 1, խմբագիր՝ Ռ.Աթայան, Երևան, 1969, էջ 86:

[35] Bnla Bartok, ժողովածու Բ.Սաբուլչիի խմբագրությամբ (գերմաներեն), Բուդապեշտ, 1957: Ցիտատը բերված է Ա.Բուկովինի «Черты стиля» հոդվածից, «Советская музыка», 1967, N 12, էջ 121:

[36] Կոմիտաս, Երկերի ժողովածու, հ.2, խմբագիր՝ Ռ.Աթայան: Երևան, 1969, էջ 25-28:

[37] Կոմիտաս, Երկերի ժողովածու, հ.3, խմբագիր՝ Ռ.Աթայան: Երևան, 1969, էջ 28-31:

[38] Н.Агафонников. Симфоническая партитура, Л., 1967, с. 42.